



Vischnaunca Lumnezia

| Palius 32D, CH-7144 Vella

| +41 (0)81 920 60 00

| info@lumnezia.ch

| www.lumnezia.ch |

PROTOCOL RADUNONZA COMMUNALA LUMNEZIA 14 D'AVREL 2023

2023/01

14 D'AVREL 2023
CANZLIA COMMUNALA, 7144 VELLA
Palius 32D, 7144 Vella

Tractandas

1. Avertura	3
2. Protocol dalla radunonza communal da dils 16 da december 2022 (2022/03).....	3
3. Concessiun da credits.....	3
3.1. Cumpra d'in auto cistiarna pil corp da pumpiers Lumnezia	3
3.2. Alp sogn Carli; Sanaziun dil tetg dalla tegia, implont fotovoltaic e nova lingia da latg naven dall'alp tochen el vitg da Morissen.....	4
3.3. Sanaziun e remplazzament lingias d'aua e canalisaziun Via Vitg Su el vischinadi da Morissen.....	5
3.4. Sanaziun dil scaldament dalla casa da scola el vischinadi da Vrin	5
3.5. Sanaziun dils parcadis, canalisaziun, lingias d'aua e lingias d'electricidad a Sur Val – Davos Munts, Vattiz el vischinadi da Degen	6
3.6. Ruta dad ir cun velo "Nino Schurter Biketrail" ad Uors el vischinadi da Suraua	7
4. Rendaquens finals da projects	8
▪ Sanaziun dil provediment d'aua dils uclauns Lumbrein.....	8
▪ Sanaziun dalla via da meglieraziun Camadra – Tschantegn el vischinadi da Lumbrein	9
5. Varia	9

Protocol dalla radunonza communal Lumnezia (2023/01)

Datum: Venderdis, ils 14 d'avrel 2023
 Liug: Halla plurivalenta dalla casa da scola Sutvitg 28E, 7144 Vella
 Cuoz: 20:00 – 22.30 uras
 Presents: 69 votantas e votants
 Parsura: Daniel Solèr, president communal
 Actuara: Silvana Caviezel, canzlista communal

Tractandas

1. Avertura

Il president communal Daniel Solèr arva la radunonza communal fagend beinvegni als presents ed engrazia ad els d'haver dau suatientscha agl invit.

Il president constatescha, che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia, aschia che la radunonza ei cumpetenta da prender conclus.

Seschau perstgisar han:

- Gian Caduff, commember dalla suprastonza communal
- Remo Derungs, commember dalla suprastonza communal
- Gian Derungs, deputau dil cussegl grond

La radunonza elegia dus dumbravuschs

- Serafin Caviezel, Vrin
- Rino Caduff, Morissen

2. Protocol dalla radunonza communal dils 16 da december 2022 (2022/03)

Il protocol dalla radunonza communal dils 16 da december 2022 ei staus exponius naven dils 13 da schaner 2023 ella canzlia communal e silla pagina d'internet dalla vischnaunca, pia duront silmeins 30 dis.

Tenor art. 34 constituziun vegn il protocol dalla radunonza communal exponius per investa dils votants sil pli tard in meins suenter la radunonza duront 30 dis en casa communal e silla pagina d'internet dalla vischnaunca cun corrispundenta publicaziun. Recuors ein d'inoltrar en scret duront quei temps dall'exposiziun alla suprastonza communal. Ils recuors vegnan tractai alla proxima radunonza communal. Decisiva ei aschia la publicaziun silla pagina d'internet dalla vischnaunca (cun corrispundenta publicaziun).

Il president communal Daniel Solèr constatescha, ch'igl ei buca vegniu inoltrau recuors en scret aschia ch'il protocol dalla radunonza communal dils 16 da december 2022 (2022/03) vala sco approbaus tenor art. 34 dalla constituziun dalla vischnaunca Lumnezia.

3. Concessiun da credits

3.1. Cumpra d'in auto cistiarna pil corp da pumpiers Lumnezia

- a) Approbaziun dil project
- b) Concessiun dil credit da CHF 300'000

Situaziun iniciala

Il vehichel digl onn 1979, ch'ei staziunau a Lumbrein, basegna adina puspei reparaturas las qualas van cul temps els daners. Ils responsabels dil corp da pumpiers han fatg la ponderaziun schebein ins vegli aunc investir quels daners per in vehichel schi vegl ni sch'ins dueigi gest remplazzar quel. La finala ein els vegni tier la conclusiun da cumprar in niev vehichel.

Il president communal explichescha che la cumpra d'in auto cistiarna pil corp da pumpiers Lumnezia ei previus ella planisaziun da finanzas per igl onn 2024. Ils temps da furniziun per tals vehichels ein denton aschi liungs che la cumissiun da pumpiers ha tschentau alla sprastonza communal la damonda d'astgar menar atras la procedura d'offertas e surdada da lavurs gia uonn.

Il calcul da cuosts vegn presentaus alla radunonza:

Auto cistiarna	248'941
Cabina dubla	<u>44'522</u>
Total	293'463
Restituziun spitgada Unimog:	20'000
Contribuziun assicuranza d'edifecis: (20% dil vehichel)	58'720
Damonda da credit (incl. tpv)	300'000

Conclus

La radunonza communal decidea cun gronda majoritad e senza cuntervuschs ed abstenziuns da conceder il credit da CHF 300'000 per la cumpra d'in auto cistiarna pil corp da pumpiers Lumnezia.

3.2. Alp sogn Carli; Sanaziun dil tetg dalla tegia, implont fotovoltaic e nova lingia da latg naven dall'alp tochen el vitg da Morissen

Situaziun iniciala

Il project per la sanaziun dil tetg dalla tegia, implont fotovoltaic e nova lingia da latg naven dall'alp tochen el vitg da Morissen vegn presentaus alla radunonza communal dil schef dil department communal per agricultura, Martin Sgier (la part dil tetg dalla tegia e la lingia da latg) e dil schef dil departament communal per la planisaziun dil territori ed immobiglias, Primus Cavegn (la part dalla fotovoltaica).

Il calcul da cuosts:

Impressari (lingia da latg)	260'000
Furniziun bischel latg	3'000
Cussegliaziun ambient	7'000
Cuosts trafo	115'000
Planisaziun indrez solar	15'000
Indrez solar	200'000
Adattaziuns tetg	100'000
Nunprevediu	<u>50'000</u>
Total	750'000
Damonda da credit (incl. tpv)	750'000

Damondas / discussiun

Ueli Caduff da Morissen damonda sch'ins hagi ponderau da nezegiar era la produziun d'energia d'unviern e sch'ei seigi planisau da drizzar igl indrez aschia per schar ir giu la neiv per quei intent.

Primus Cavegn rispunda ch'ei seigi planisau da buca metter si crutschs da neiv per che la lavina da tetg sappi ir giu.

Plinavon damonda Ueli Caduff sch'ei seigi vegniu ponderau davart dils purs cons onns ch'ei

vegn aunc mulsch sill'alp. Ei munglassi buca esser aschia ch'ei vegnessi en cuort calau da mulscher.

Martin Sgier sa informar ch'ils purs hagian fatg quellas ponderaziuns e ch'ei seigi ord vesta dad oz planisau da mulscher aunc beinenqual onn sin quell'alp.

Conclus

La radunonza communal decida cun gronda maioritad e senza cuntervuschs ed abstenziuns d'approbar il project e conceda il credit da CHF 750'000 per la sanaziun dil tetg dalla tegia, implont fotovoltaic e nova lingia da latg naven dall'alp tochen el vitg da Morissen.

3.3. Sanaziun e remplazzament lingias d'aua e canalisaziun Via Vitg Su el vischinadi da Morissen

Situaziun iniciala

Il schef dil departament communal per traffic, ovras publicas ed ambient, Nathan Solèr explichescha il project alla radunonza communal.

Il calcul da cuosts che vegn presentaus alla radunonza:

Planisaziun/ survigilanza	10'000
Impressari	91'000
Catram	136'000
Sanitar	92'500
Illuminaziun publica	19'500
Geometer	5'000
Nunprevediu	26'000
Total	380'000

Cuosts tiarzs	
Assicuranza da baghetgs	13'700
Cuosts sclusadurs privats	7'000
Damonda da credit (incl. tpv)	380'000

Damondas / discussiun

Rino Caviezel da Vella damonda sch'ei vegni coordinau il project dalla lingia da latg giu dall'alp s. Carli culla sanaziun dalla via Vitg Su.

Nathan Solèr declara che la lingia da latg vegni giu el vitg en in auter liug e tangheschi aschia buca quei project per la sanaziun dalla via Vitg Su.

Conclus

La radunonza communal decida unanimamein e senza cuntervuschs ed abstenziuns d'approbar il project sanaziun e remplazzament lingias d'aua e canalisaziun Via Vitg Su el vischinadi da Morissen e conceda il credit da CHF 380'000.

3.4. Sanaziun dil scaldament dalla casa da scola el vischinadi da Vrin

Situaziun iniciala

Il schef dil departament communal per il svilup dil territori ed immobilias, Primus Cavegn declara detagliadamein alla radunonza communal il project dalla sanaziun dil scaldament dalla casa da scola el vischinadi da Vrin.

La pegna ella casa da scola ei vegnida installada igl onn 1995. Igl Uffeci cantunal per la natira ed igl ambient (UNA) munglescha mintg'onn puspei ch'ella corrispundi buca pli allas normas per la protecziun dil ambient, seigi quei cun las emissions da CO₂, sco era da puorla fina.

La pegna scaulda ton la casa da scola sco era cun ina lingia sutterrana l'anteriura casa communal da Vrin.

Il calcul da cuosts presentaus alla radunonza:

total cuosts sanaziun pegna		280'000
honorar planisader ventilaziun e pegna		26'000
honorar planisader electro		5'000
nunprevediu / reservas 10%	5.0%	14'000
total excl. tpv		325'000
tpv	7.7%	25'000
total cuosts da project incl. tpv		350'000
Damonda da credit (incl. tpv)		350'000

Damondas / discussiun

Ei vegn dumandau ord il miez dalla radunonza sch'ei seigi vegniu ponderau d'installar ina pumpa da callira.

Primus Cavegn declara ch'ei seigi installau radiaturs e quells seigien buca cumpatibels cun ina pumpa da callira. Las midadas che stuessien vegnir fatgas fussien bia memia grondas en cumparegliaziun cul nez.

Conclus

La radunonza communal decida unanimamein e senza cuntervuschs ed abstenziuns d'approbar il project sanaziun dil scaldament dalla casa da scola el vischinadi da Vrin e conceda il credit da CHF 350'000.

3.5. Sanaziun dils parcadis, canalisaziun, lingias d'aua e lingias d'electricitad a Sur Val – Davos Munts, Vattiz el vischinadi da Degen

Situaziun iniziala

En rom dil project per la sanaziun dallas vias da meglieraziun Lumnezia, per il qual il credit ei vegnius concedius all'urna, vegn en in'emprema etappa luvrau vid il tschnacun Sur Val – Davos Munts.

Quella via survescha medemamein sco avertura dils quartiers habitai Sur Val, Davos Munts Dado e Davos Munts dadens, sco era pil traffic tier il lag da far bogn a Davos Munts. Ils vischins ch'ei pertuccai directamein e persunas interessadas ein vegni orientai a caschun dad ina sera d'informaziun.

Ina part dil project ei la dislocaziun dils parcadis da l'autra vart dalla via sper il lag da far bogn. Igl intent ei d'evitar da stuer traversar la via per vegnir naven dil parcadi tiel lag. Medemamein vegnan ils parcadis existents sper ils molocs da rumians sanai e vinavon las lingias d'aua e d'electricitad. La suprastonza communal presenta il project el il calcul da cuosts alla radunonza:

Catram	121'000
Impressari	534'000
Aquaduct d'aua	110'000
Plontaziun	30'000
Planisaziun	90'000
Illuminaziun publica	13'000
Geometer	7'500
Lubientschas	4'500
Divers/ Nunprevediu	70'000
Total	980'000
Damonda da credit (incl. tpv)	980'000

Damondas / discussiun

Fabiola Carigiet (hosp) damonda sch'il diever dils parcadis vegni a restar gratuits. Quei che vegn confirmau.

Roman Andreoli, Vignogn damonda sch'ils parcadis seigien dimensiunai gronds avunda era per bus ed autos pli gronds. Era quei sa vegnir confirmau.

Vinavon damonda el sch'ei seigi era previu da far parcadis per velos e töffs. Quella menziun vegn prida encunter.

Ursin Riedi da Morissen damonda sch'ins sappi cumparegliar ils cuosts per quels parcadis cun parcadis en auters loghens. Sche quels steten en ina relaziun. La damonda sa buca vegnir rispundida damai ch'ils cuosts ein vegni calculai el total e buca per mintga parcadì.

Gionin Caduff da Vattiz menziunescha ch'ei stopi vegnir ponderau co vegnir vitier culla glied quei mument ch'ils parcadis seigien pleins, oravontut la stad cu il menaschi da bogn ha sesiun aulta. Ei vegni mess autos crusch e travers ed ins duessi motivar la glied da vegnir cul bus ni a pei.

Ils president communal pren encunter la menziun e sa il medem mument informar che la ruta Davos Munts ei integrada ella ruta da dil bus turistic. Plinavon menziunescha el en quei connex il Tuk Tuk, ch'ei actualmein staziunau a Vella sper la piazza da giug e sa vegnir empristau ora.

Conclus

La radunonza communal decide unanimamein e senza cuntervuschs ed abstenziuns d'approbar il project sanaziun dils parcadis, canalisaziun, lingias d'aua e lingias d'electricitad a Sur Val – Davos Munts, Vattiz el vischinadi da Degen e conceda il credit da CHF 980'000.


3.6. Ruta dad ir cun velo "Nino Schurter Biketrail" ad Uors el vischinadi da Suraua

Situaziun iniciala

Il schef dil departament communal per turissem e svilup economic, Curdin Capeder declara alla radunonza communal igl avanzament dil project e sa comunicar ch'in recuors d'entgins convischins da Suraua ha saviu vegnir slegiaus en cunvegrientscha vicendeivla.

In dils facturs pil surpli da cuosts ei la midada dil trapass dalla ruta denter auter cun ina colligaziun ed in'untgida durant il temps da pasculaziun cun vaccas mumma a Planezzas.

In'ulteriura idea ei da reactivar il trutg existent che vegneva duvraus avon onns per ir giu egl englar "Inslas" a pover il tiers.



Ils 17 da december 2021 ha la radunonza communal concediu il credit da CHF 300'000 pil project.

Ussa vegn dumandau per in credit supplementar da CHF 120'000.

Conclus

La radunonza communal da decida unanimamein e senza cuntervuschs ed abstenziuns d'approbar la midada dil project per la ruta dad ir cun velo "Nino Schurter Biketrail" ad Uors el vischinadi da Suraua e conceda il credit supplementar da CHF 120'000.

4. Rendaquens finals da projects

▪ Sanaziun dil provediment d'aua dils uclauns Lumbrein

Situaziun iniziala

La radunonza communal dils 17 da december 2017 ha decidiu d'approbar il project e da conceder in credit da CHF 1'700'000 per sanar il provediment d'aua dils uclauns Lumbrein. Il project ei vegnius realisau e siara cun cuosts da CHF 1'826'081.50, pia cun in surpassament da credit da CHF 126'081.50.

Ils cuosts secumponan sco suonda

Calculaziun da cuosts	15-12-2017	02-03-2023
Provediment Surin / lingias Vrin	600'000	701'114.50
Provediment Pruastg Dado / lingias	360'000	682'010.00
Provediment Silgin / lingias	440'000	300'101.00
Provediment Sogn Andriu / Nussaus	300'000	142'856.00
Cuosts totals	1'700'000	1'826'081.50
Contribuziuns		
Confederaziun	386'300	477'925.00
Cantun	348'300	430'133.00
Assicuranza d'edifecis GR	112'800	140'087.00
Societad Ovra electrica Lumbrein (SOEL)		63'117.70
Contribuziuns totalas	847'000	1'111'262.70

En la totala

Calculaziun da cuosts	15-12-2017	02-03-2023
Cuosts totals	1'700'000.00	1'826'081.50
Contribuziuns totalas	847'000.00	1'111'262.70
Cuosts restonts	852'600.00	714'818.80
Credit radunonza communal: 15-12-2017	1'700'000.00	
Total cuosts da project	1'826'081.50	
Surpassament dil credit	126'081.50	

Conclus

La radunonza communal concluda unanimamein e senza abstenziuns da conceder il credit supplementar e d'approbar il rendaquen final per il provediment d'aua dils uclauns da Lumbrein cun in surpassament da credit da CHF 126'081.50 ed in total da cuosts da CHF 1'826'081.50.

▪ **Sanaziun dalla via da meglieraziun Camadra – Tschantegn el vischinadi da Lumbrein**

Situaziun iniziala

La radunonza communal dils 07 da fevrer 2022 ha decidiu d'approbar il project e da conceder in credit da CHF 600'000 per la sanaziun dalla via da meglieraziun Camadra – Tschantegn el vischinadi da Lumbrein.

Il project ei vegnius realisau e siara cun cuosts da CHF 622'012.15, pia cun in surpassament da credit da CHF 22'012.15.

Damondas / discussiun

Casper Arpagaus da Tersnaus damonda sch'il project vegni finanziaus cun contribuziuns sur la meglieraziun ni ord il fondo da contribuziuns dils commembers.

Martin Sgier declara ch'il sistem da baghegiar en la cuvrida dallas vias cun la maschina vegni buca subvenziunau. Tenor lescha da meglieraziun vegnan taxas incassadas e sche quellas vegnan buca duvradas si van ellas en ina reserva, che vegn lu duvrada per quels projects da vias.

Gionin Caduff, Vattiz damonda con ch'igl accumpignament digl ambient hagi custau per quei project. El ei dil meini ch'ei duvrassi bu quella cussegliaziun. Quei seigi mo per far daners.

Nathan Solèr sa informar che quei seigi stau rodund CHF 8'000.

Conclus

La radunonza communal concluda unanimamein e senza abstenziuns da conceder il credit supplementar e d'approbar il rendaquen final per la sanaziun dalla via da meglieraziun Camadra – Tschantegn cun in surpassament da credit da CHF 22'012.15 ed in total da cuosts da CHF 622'012.15.

5. Varia

1) Informaziuns e menziuns dil president communal, Daniel Solèr:

- Zona da planisaziun:
 - Il concept general sur dil maletg dils vitgs ei vegnius elaboraus entras il cusseglader dalla vischnaunca, Michele Vassella.
 - La suprastonza communal ha prolunghiu la zona da planisaziun per la vischnaunca Lumnezia tochen miez mars 2025.
 - Plinavon ha ella elegiu dus cussegladers da formaziun; Patrik Rothmund (Trun) e Vincenzo Cangemi (Cuera).
 - Ed ella ha inoltrau agl uffeci da planisaziun cun datum dils 07 da mars 2023 ils documents dalla revisiun totala per la preexaminaziun:
 - Rapport da planisaziun e cooperaziun
 - Plan general da formaziun
 - Plan general da colligiazion (aua, traffic, energia)
 - Plan da zonas
 - Lescha da baghegiar
- El plan directiv d'energia nua ch'il tema principal ei la producziun d'energia cun vent ni cun aua ein buca vegni menziunai ils implonts da fotovoltaica. Quels ein aunc en lavur tier la confederaziun. Sur la pagina digl uffeci d'energia sa mintgin e mintgina prender posiziun davart quels temas.

- Ils adressats da vias e baghetgs vegnan midai. Igl emprer sboz ei avon maun. Quei ha per consequenza midadas d'adressas per l'entira val. Ei vegn a dar seras d'informaziun pils convischins.
- Terren da baghegiar communal sco era habitaziuns communalas ch'ei libras vegnan publicai en emprema lingia silla pagina d'internet dalla vischnaunca avon che publicar en auters loghens.
- Loghens d'inscunter en cass d'urgenza ein signalisai a Lumbrein, Uors e Vella. Il stab da crisa ei el cass d'urgenza staziunaus el local da pumpiers a Vattiz.
- Il quen e rapport communal annual san vegnir dai giu per a caschun dalla radunonza communal dil settember. Il motiv ei in retard pervia dad ina midada dil program da contabilitad.
- Projects da solar e fotovoltaica en Lumnezia ein buca concrets mobein sulettamien en fasa d'evaluaziun. La suprastonza communal ha tschentau damondas criticas en connex cul transport d'energia giu dil cuolm, zonas da protecziuns etc. alla fatschenta che planisescha ils implonts, che vul denton buca vegnir numnada.
- Il manischnunz dil bus turistic, Ueli Gloor ha visau la piazza sin fin zercladur 2023. El ha gia survargau la vegliadetgna da pensiun ed ei ussa sedecidius per quei pass. Igl inserat ei publicaus. Il president communal engrazia ad Ueli Gloor per sia lavur prestada.
- Novas collaboraturas ein vegnidas engaschadas per l'administraziun communal: dapi igl 1. da schaner 2023 Julia Cavegn da Sagogn, oriunda da Vella, en pensum da 40%, dapi igl 1. da fevrer 2023 Rita Collenberg da Morissen en pensum da 50%.
- La tscherca d'in menader pigl uffeci da baghegiar cuora aunc. Collaboraturs pil secretariat da baghegiar san pli probabel vegnir elegi proximamein.
- Fegl official dalla Surselva: ils texts ston naven dad immediat vegnir endattai directamein dall'administraziun communal sin ina plattafuorma.
- Deponias verdas: curdems verds duein buca vegnir deponi ellas vals mobein els loghens signalisai dallas deponias publicas.
- En spezial menziunescha il president communal la finiziun da lavur cul pensiunament prematur dil menader dil register funsil Lumnezia, Ueli Caduff da Morissen.

Daniel Solèr engrazia ad Ueli Caduff per sia impurtonta lavur prestada, ch'ei vegnida dabien sur biars onns alla Lumnezia.

Ueli Caduff survegn il plaid ed era el engrazia alla populaziun lumneziana per la fetg buna collaboraziun, che ha entschiet gia cun las anteriuras vischnauncas avon la fusiun Lumnezia. Oravontut ha giu liug ina collaboraziun sil sector uffeci da baghegiar, uffeci da taglia e controlla da habitonts.

Era als possessurs da secundas habitaziuns engrazia Ueli Caduff. La gliעד ha fatg diever dil notariat. Denter 95-97% dallas fatschentas ein vegnidas fatgas sur il cudisch funsil ora, quei che secapeschi buca da sez.

Ueli Caduff e ses collaboraturs han empruau da luvrar tenor treis principis:

1. Tracta il vischin sco ti vesses bugen ch'el tracti tei.
2. Sch'ins ha da sedar giu cun beins immobigliars va ei adina per bia daners. Els han empruau da buca daventar materialists. Las personas han il dretg da vegnir tractadas cun respect.
3. Sco menaschi da survetsch han els empruau da prestar in survetsch magari sur il duer ora, che vess buca stuiu esser. Quei ha buca adina mo dau resuns positivs davart dad auters uffecis funsils.

Ueli Caduff declara co la vischnaunca ha saviu profitar dallas taxas digl uffeci funsil. El dat ina survesta cun enqual cefra dils pagaments da totalmein CHF 1'695'797 ord il gudogn da menaschi annual. Las valetas dallas immobiglias che han midau maun ed effectuau ina taglia sin midada da maun el decuors da 20 onns muntan a totalmein CHF 533'300'000.

Tenor Ueli Caduff ha la politica stuiu semetter en biaras ga per ch'igl uffeci funsil resti en Lumnezia denton ussa vegn il biro a Vella deplorablamein sligliaus e dislocaus a Glion.

2) Damondas e menziuns ord las retschas dalla radunonza:

- Martin Cabalzar da Cumbel menziunescha aunc inaga il plan directiv cantunal d'energia. El savess bugen tgei strategia che la vischnaunca Lumnezia ha en connex cun energia solara, da vent ed energia hidraulica. Il plan era da prender vi las auas da Vrin per alzar il lag da Zervreila. Zervreila hagi detg tenor rapports dalla gasetta ch'ei duvrassi bu l'aua da Lumnezia mobein ei prendessien bugen l'aua digl ual da Canal.

Martin Cabalzar ei dil meini che la vischnaunca stuessi reagar en quella situaziun e forzar vinavon quels project.

Il president communal sa confirmar che la suprastonza communal ei adina puspei en discuors en connex cul project dalla Kraftwerke Zervreila AG (KWZ). La vischnaunca ha dau il signal da vuler collaborar en quella causa e metta prioritad da saver realisar la lingia da Vrin a Val.

Plinavon hagi la vischnaunca buca fatg nuot ils davos onns, ins stopi denton era ponderar sch'ils projects seigien insumma realisabels. P.ex. tier in implont a Cavel stuess l'energia vegnir transportada sur 10 km a Tavanasa, quei che seigi pauc realistic cun la lingia existentia, che fussi bia memia fleivla per quei.

La strategia dalla vischnaunca ei da planisar implonts da fotovoltaica sin infrastruttura existentia sco p.ex. l'ara Turatscha, l'alp s. Carli, Siglinas a Vella.

- Rudolf Caduff da Cumbel fa attents che las tablas per ils loghens d'inscunter d'urgenza ein da tener en lungatg romontsch.

Ei vegn buca pli giavischau il plaid ed il president communal, Daniel Solèr siara la radunonza.

El engrazia a convischinas e convischins per la partecipaziun, pil sustegn e la confidanza demussada enviers la suprastonza communal.

7144 Vella, ils 14 d'avrel 2023

Il president:

L'actuara:

Daniel Solèr

Silvana Caviezel